

曾文正公書札

曾文正公書札卷二十三

覆胡宮保

都公游移展轉令人不快春霆至今未到宋副將業於初七出隊與賊相對但賊未接仗而去耳王心牧自東流建德來此途次並未聞春霆消息尤爲可怪寶軍當如尊指卽在南岸遣撤幼丹不願做官而許來居做幕當備關聘專足邀之皖北兩司竇難其人不如待介唐到一以委之蓋本府之權固可委州縣代理其非皖省之官則侍可奏雷也知稼穡知情僞不剝取官財民財察吏之論當奉明教爲圭臬侍頃致李小泉書言取人賈有操守而無官氣多條理而少大言附於大教之後若能引

出一班正人倡成一時風氣則侍與公所藉以報國者也

覆胡宮保

春霆尙未到宋國永連出隊三日遇雨皆收不得開仗賊亦頗畏鮑軍也浙江賊退一回平望一退石門當不足慮左公到後卽由廣德進兵合左凱凡萬一千人擬另撥四千以附益之或足以庇浙而規蘇乎

覆左季高

此間望君如歲不知大旃果成行否浙事日內漸鬆賊匪一退石門一退平望再守二月貴軍至廣德州則杭城安穩矣凱章至旌德因霆軍未至太平故凱亦不進春霆至今未來殊可駭

翼宋國永亦至太平矣次書至徽接張筱浦防務後卽赴甯國
接印弟初三日奏雷駱公一片不知尊處何日接到果當事理
否八九十三個月餉項俱絀乞糴之舉昨又咨駱公敬求閣下
便中一爲催請陳俊臣三千勇仍不能招赴南路前雖咨停卽
日又當咨行并囑後泉專差請之仍求閣下玉成之爲要

覆毓右坪中丞

接奉惠緘敬聆所示鄧聯請優敘李君似應請加臬司銜仍從
閣下原議以勞績之多實分獎敘之高下庶爲允叶至李君捐
銀五千應另爲其子弟請獎俾勞績與捐項二者不淆鄧聯如
有捐款亦另爲其子弟請獎照銀定級乃爲公允是否有當敬

求卓裁聞七月初五天津兵敗洋酋入城僧邸退至通州京師
大震 聖心焦勞弟與閣下凡辦一事皆彼此謹慎悉心商酌
奏贖尤宜加敬無拂 天意弟處各事如有不當望閣下常常
指示免致 聖心既慮北極又憂南服也兵勇同處易生弊端
須擇一好將官統之以資調護兵丁之太疲者儘可另募挑補
略厚其口食亦未見兵之必不如勇也經費若少尙可增加此
事卻不宜太省閣下以爲何如

覆張凱章

惠緘具悉以我軍兵力言之靈營本可卽進涇縣貴軍本可迅
援甯郡以地勢賊情言之狗逆有踞甯國縣之說叢山烏嶺防

兵未可深恃僕所以囑閣下堅駐於德不可輕動者爲此二端也次奇之平江營今日可到徽郡駐紮績溪決可無慮目下貴軍駐旌靈軍駐太平江軍駐歙故老營駐祁甚得犄角之勢請閣下將甯涇地勢賊情一一看熟春霆到卽進剿當可得手

覆周百祿

惠書危迫情形不忍卒讀若非大力堅忍則此時早不可問敝處前派張道宋將兩軍援甯於初八初十日到旌太二縣因鮑鎮超未到宋將向未帶此大隊遂爾遲遲未進今接閣下此信已札催張宋飛速進涇援甯矣札稿抄呈一覽因恐道梗特寫小字信奉寄餉銀亦交張道帶去

致李次青

昨奉復一緘不知尊軍派防叢山關者果若干人或五百人亦可閣下駐徽郡軍威不可以不肅氣勢不可以不壯頃接筱帥信知十五日索餉者鬧至公館務懇閣下查明迅即正法愈多愈好愈速愈好若此次能殺至二十人則以後之事迎刃而解不特筱帥卸防之事易了即僕與閣下接防亦爭此下手一着平日煦煦之仁必須力改即日有公牘奉致

致張凱章

今日得信知甯郡十二日失守曷勝憂憤為今之計只有堅守二字閣下守旌德三溪軍守太平甘棠次青守徽州郡城敝

處老營守祁門又派禮字等營二千餘人守績溪叢山關等處
五路相爲犄角必可無虞待鮑鎮左公各軍到齊再行進剿目
下貴處最爲吃重務望堅守靜鎮不可慌亂城可守則守城城
不可守則守隘守壘禮字營未到叢山關之前設或賊虜續溪
抄竄軍之後路亦不必慌所有米糧子藥卽從太平運至三溪
東邊後路縱斷西邊後路必不斷也總期靜守爲要

覆胡宮保

三接手敘冗中未得速報此間諸事方意次青接印張宋進兵
左鮑將至可期漸有頭緒不料甯國城外各營盡被賊踏毀郡
城十二夜失陷矣徽兵關餉擁至張公行館洵未已鮑鎮查

無信息左公又被毓公咨留焦灼萬分現在四眼狗踞甯國縣
楊七麻子踞石埭縣古隆賢賴裕新踞涇縣偽侍王亦來只要
靜守半個月賊不能逞志於楚軍則必派一悍賊守甯國而狗
逆率大股援懷桐矣意欲請希楷帶三營來江南一助合之朱
唐共四千五百人儘可一戰左公到日希仍北渡狗逆大股至
桐懷當由東梁山渡江不能似我之速也可否求商之希公速
行定奪

獲李次壽

一甯防潰兵潰勇僕有告示稿一紙護票稿一紙如尊處探得
甯郡潰已失守潰兵實已西來則請尊處一面照繕告示四五

張貼於徽州左近一面飛報敵處以便多繕多貼如甯國失守之信不確不可亂貼至要至要

一禮前後河溪等四營二千三百人即日可至徽州甯郡未失則四營赴旌德甯郡果失則四營赴績溪

一貴軍須餉萬金應卽照准有則一次領去無則分兩次領亦不出十日也廖道解甯之萬二千金儘可動用請卽照告示中之法用之如甯郡未失須交凱章帶解不可動用也

一貴軍請全數守徽不必分營赴績徽郡如有賊來犯是閣下之專責徽兵如再開餉當嚴拏重辦亦是閣下之責此外之事閣下不必兼管職專則心一也徽兵七月以前欠餉僕不能管

亦不能出示實無銀錢閣下豈全不知耶目下兵勇惡習驅之
不去殺之不畏僅僅看操禁煙等空言豈遂知難而退耶
一大軍以景德鎮建德兩路爲來路僕在此兼轄之又池黟太
后皆在西邊惟祁門扼西之要僕不可赴徽郡也萬一績溪有
疏堅守徽祁旌太自可安穩凱軍卽以霆軍爲餉道亦無不可

覆張筱浦中丞

侍在祁門扼景鎮建德兩處之來路顧池石涇太之防務不可
輕動次青在徽彈壓防守亦不可輕動績溪之防另派禮字營
等二千餘人往侍缺餉與尊處略同本年并未具摺請餉非廉
也知鄰省艱難奏亦不應耳徽防七月以前欠餉不能代給亦

不能再行出示伏希鑒亮浙帥奏請台旆赴杭若尊意不願再從事於干戈尚可婉委陳奏 聖心本無固必儒臣雍容之度久爲九列所共亮惟目下急於成行似多未便不如委蛇數日待索餉諸弁風波稍定然後起程或未晚也江長貴刻下景況極苦昨有信來求調回徽防擬卽復畱允之

致李次齊

今日竟未接手緘不知台從尙在郡城抑已出外查閱關隘鄙意閣下新集之軍宜合而不宜分宜在徽郡堅築營壘或守城堞以立於不敗四字爲主績溪之叢山關如果確有把握或由貴軍先分一二營守之若無十分把握則貴軍專保郡城總

不宜分禮字營十九起行二十二可到郡閣下與凱章穩住五日則人心固矣

覆張凱章

惠緘知甯郡果已不守賊氛正惡曰內當撲績溪叢山關等處閣下切不可慌亂亦不可派隊遠出迎剿總以靜鎮爲主禮字等營至績溪次青營壘堅固東路必穩宋副將在太平西路本穩閣下在前敵萬一東路餉道或斷西路餉道必可常通也李希菴帶二千人月杪可到祁門穩住十日則此後可進剿矣甯防之兵勇逃出者徽郡尙存銀萬二千兩請次青與閣下速發以救其飢

覆駱箭門中丞

前此奉畱台旃曾呈三咨一緘想次第上達葦鑿此閒軍事本謂張李已到左鮑將來可期日有起色不料甯國城外各壘盡被賊破郡城失守廣德再陷南陵孤懸賊中尤爲朝不保夕目下四眼狗楊七麻子古賴諸賊皆在皖南而徽甯各兵歸敵處統轄新舊交替紛紛索餉外寇內訌一時并集現派凱章守旌德霆軍守太平次青守徽郡楊鎮魁守績溪以待左公之至仍求閣下將協餉五萬借餉五萬卽日起解以濟眉急并求將擬帶入蜀之兵改援南贛安皖安江卽以安湘揚勝感荷

覆胡宮保

甯郡失守廣德再陷此後竟無進兵之路無籌餉之地左公到後殊難下手春霆未至景德鎮聞今日可抵祁門此次不能不參劾矣徽兵向從浦索餉尙未解息次青十六日至徽接防復翁定以二十日成行北上不知開餉之弁不至滋事否甯防潰兵又難經理侍刻有告示一張護票一紙附呈一閱不知可弭亂端否皖北安慶錢漕事未及細思然旣征錢漕似宜以翁中丞爲主此等界限不可盡棄公意以爲何如希菴帶二三營南來相助務求閣下惠成之非至急不肖爲此舉也

覆張凱章

所示經理新營之法至爲切當然亦在九月內乃可行之就其

中聲名尤爲狼籍者請再細查當重懲之貴營哨弁中有善習地勢者飭將旌績交界之地看清次青分二營在叢山關失利卽日賊必破績溪犯徽郡務求貴軍靜鎮不動慎無徇人之請分兵遠出狗逆從不先發最善反客爲主貴軍不可墮其術中爲賊所致也旌休交界是貴軍內後路旌太交界是貴軍外後路不可被賊抄斷

致胡宮保

次青到徽因徽防交替及積欠口糧糾結數日派二營防叢山關分守兩卡一營失利營官陣亡叢山關去績溪縣三十里去徽州府九十里次青現在徽州趕辦城守事宜該城蓬蒿沒人

頹敗不堪料理侍續派禮字河溪等四營二千一百人到徽平江六營守城內禮河四營紮城外或可保全凱章紮旌德靜鎮未動春霆到太平本營亦令其堅守不動惟祁門老營太單既恐賊衝入休甯斷徽祁之文報又恐索餉內訌務求闔下告希菴帶二三營速來一助季翁到巖鎮希公仍可北渡決不食言

致陳作梅

二十一日之戰所關甚大若兩路入歙平江營恐難支持鄙人所稱堅守靜鎮者老營之大端其中出奇變化固不可一二遙制也山中行兵以哨探向導爲要務祈留意

致鮑春霆

聞禮字河溪四營大敗徽州被圍危急之至請閣下全軍節節入嶺田休甯救援徽州張凱章卽紫太平顧貴軍之後路至切至切

致胡宮保

徽州於二十五日酉刻失守次青聞實由大南門出城至今三日尙無確耗殆已徇節哀哉此人吾用之違其才也目下所最懼者賊由婺源竄樂平斷截祁門之後路蹂躪江西之腹地其次則恐凱章春霆兩軍斷於嶺外不得歸來至祁門老營得希藉帶四營來必可萬全前因朱唐三千人內有一千七百未見過仗故有此請今來四營千足萬足餘營可不再南渡恐北岸

大警希公單騎回救則易大隊四渡則難也

致李希菴

聞已拔四營來援感慰無極其續撥六營南渡之說昨已寄信
明潤帥處止之想已達尊聽矣今里聞袁午橋潰退是江北之
急卽在自前權衡輕重應請閣下將所拔四營調回北岸敝處
一面派人至中途截止目下祁門老營已穩鮑軍今日可入嶺
內張軍明日亦可入嶺此間當站得住所慮者賊由婺源竄入
江西腹地耳國藩之視北岸更重於南岸南岸縱有大變而江
西省城必尙可保北岸若有大失卽漢口武昌亦恐難保請探
明六安州賊情若緊求閣下單騎感帶一營來此相會密論全

局如六安太緊則并不來會亦可

覆張凱章

湘勇向不長守城而善於修壘善於守壘請速出城紮營不可因循無論高山平地總以挖濠爲主愈深愈妙其石板不可挖者設法或修一段木城或作越牆越濠俱可

覆張後浦中丞

頃接景鎮惠緘欣悉文報照常六轡無塵至以爲幸此間自送別台旆後申刻卽聞徽郡失陷之信嘆台端吉祥之身不特脫離此大災變抑且不見而不聞也次青至今無一確耗而軍民皆言其業已出城未死殊不可解現今鮑軍紮漁亭張軍紮黟

縣其由婺源入江西之路謂左京堂禦之於樂平不知趕得及
否徽軍之張金璧吳修數楚軍之平江營禮字營皆已遣撤治
途恐不免於擾民用以爲慮耳

覆胡官保

連接來信定遠圍師竟爾全潰賊若專由慮舒以趨桐城則機
滯而兵鈍計必先攻六安從外一路包抄而入希菴至祁門小
住五日仍卽北渡斷不滿二十日途中往返僅十日也希在此
聞不令與賊交手蓋接仗後則進退不得自由此幾侍深知之
次青十日無信而外間皆言其未死似非無因楚軍入援之
諭本日始行復奏恭親王之咨亦鈔摺咨呈復之茲將摺稿錄

呈台覽主意係希菴所定與侍初計相符惟如此入奏 諭旨
派出之後卽不可少有濡滯求閣下於南北岸各車預先安排
應撤圍者預先撤圍應退紮者預先退紮俟奉到 諭旨公北
上則侍當移駐皖北侍北上則請公兼管皖南皆義不容諉其
行裝銀兩日內卽當籌畫諸求詳示

覆左季高

賊已破瀟安則不由婺源竄饒亦恐不由嚴州竄浙或當由開
化以竄德興一入德興則貴溪弋陽廣信撫建處處可慮現今
屈道鍾守守廣信養素守撫州而腹地空虛應請閣下駐紮樂
平深溝高壘以觀賊之變態而徐應之萬一賊果竄江境入德

興弟當飛飭凱章回援與閣下會合始能痛剿巨股也

致左季高

安慶寄到偽文附呈尊覽此間調度另用公牘咨達冰案南北兩岸同時喫緊鄙意南岸處處主守僅留貴軍駐樂平爲游擊撥應之師猶北岸之有希菴一軍也但須以凱章合爲一路庶可縱橫如意否則麾下新軍未知果能使兵不負將否觀此偽文二件賊之全局已經了然共白弟所佈置是否有當乞迅則詳示爲荷

覆彭雪琴

接惠緘欲以華陽鎮釐金歸入第三案報銷似不甚妥第三案

截至本年五月止僕自八年六月再出專管陸兵報銷冊內只
有陸軍之事不能兼算水軍之賬本年六月奉旨內外水師
歸敝處調度而將來敝處辦水營報銷亦只能辦內湖水師之
賬不能辦外江水師之賬蓋厚菴在湖北領餉係官胡所發之
款閣下在吳城釐金項下領餉五月以前係江撫所發之款五
月以後係國藩所發之款華陽鎮釐金如歸敝處報銷應入第
四案不宜入第三案目下南北倉皇不必急急將來總歸敝處

清釐耳

致張凱章

頃春靈來此定於明日進兵貴軍自可同進如何約會之法請

閣下與春靈商之做處添親兵須在貴軍及各處挑選意欲打仗時聯絡一氣如用陳玉恆爲旗長或爲幫帶官再於貴軍挑一哨八隊則做親兵與貴部呼吸相通矣所挑之勇亦不必盡取老手好手但得半生半熟者於貴部無大損而於做處有裨益卽係兩全之事將來成軍之後當令陳玉恆帶至尊處請閣下率之試一二仗總使做親兵與朱唐三千人合之左軍貴軍共鎔成一家耳

覆張凱章

現在賊蹤甚張我軍步步謹慎雖不能收速效亦猶可處於不敗之地陳玉恆言不妄發辦事着實將來或可練出一營可靠

之勇鮑公勇冠三軍而調度或不免疏忽之處祈閣下事

照和與有成

覆左季高

一六安州並未失守壽州被圍旋即退去霍山有賊似非大股
余會亭當足以禦之北岸狗逆尙無上犯之信希菴帶來之何
營分起遣回北岸矣

一楊七麻子現帶二萬人駐旌德縣蓋爲徽州休甯二城之援
守徽州者爲賴裕新守休者不知何賊當是古隆賢之類張鮑
今日出隊攻城恐難得手楊七麻子旣入嶺內則建德一路已
鬆將來以休甯堅城拒我而楊逆從開化之華埠入江西境是

可慮也。休若不克，終須抽出。凱章一軍爲游擊之師，乃不滯於機，請閣下派二人一審鄱陽至建德之路，中間所謂石門者，究竟險要何如。一察開化至歙縣之路，所謂華埠者，究竟應駐若干人。若凱軍與貴軍能從華埠繞至歙縣之東方，爲得勢弟用。兵病在太呆，求兄於靈活處匡我。

一北援專以明臣子之義，不問事之濟否。濶去則留，希以保湖北。弟去則留，公以保江西。弟與濶兩人之意，皆已決矣。厚菴之才，無所不可。而水陸實難兼顧，多公則難治眾志，故須留兄與希菴也。

一來示謂弟有討賊之責，兵不可太少。極是。惟凱章不願多將。

薊泉恐不宜多將二人只能各統五千春霆除自帶六千外已撥二千益之兒宜統萬人平原可大戰山開可分枝爲妙弟擬帶五千人而恐訓練不勤虛糜餉項蓋本非臨陣之才而所辦者皆糧台之事故不敢多合之微防各營已四萬有奇矣

覆李希巷

頃奉諭旨知閣下陳臬皖中至以爲慶惟皖南自徽甯連失不特無進兵之路亦幾無立腳之地吳省數千里不能提兵過問自顧職位憂憤何極潛太兩城主守不易之論石牌城主拆毀僕尙不深知鮑張進攻休甯獲一勝仗賊堅守不出恐難遽克左公尙在樂平次青處公義稍伸私情則我實抱歉不知古

人處此如何而後兩盡請公細思示我

覆李希哲

皖臬一篆前經翁中丞奏委蔣守署理如不送來自不必與之計較如其送來閣下仍以受篆爲是蓋安徽糜爛之區人人裹足遠避前此七八年閒福中丞告病告假奏疏近十次其避撫篆如避虎狼近翁中丞思卸撫篆前後亦具疏數次恩廉訪不肖接臬篆曾經嚴旨申飭此皆三年以內之事閣下若堅執不受則與三君子規避之迹無甚區別祈細酌之此閒賊破羊棧嶺入黟縣全局大震幸鮑張撥兵迅速化險爲夷此皖南近日可慰之事然祁西等處無營畢竟可慮

致胡宮保及水陸統領

南岸賊情僞侍王李世賢初意本宜浙江其破徽州乃其意外之獲其黨分布徽州嚴州等處僞侍王謀徽謀浙其意似未確定僞輔王楊七麻子駐旌德其意似爲徽州之後援保甯國之前門僞忠王李秀成挾僞小東王自蘇州蕪湖而來厚薙軍門於南陵親見其黨羽甚多昨由青陽至太平直犯羊棧嶺而入破黟縣其意專在抄祁門及鮑張之後路雖官軍兩獲大勝克復黟縣追賊出嶺而該逆必再尋別計抄我後路此賊情之大略也官軍應商戰守事宜謹陳於左

一李秀成股匪若再由羊棧嶺漳嶺入黟縣鮑張仍派隊速

剿祁門亦派人去打行仗三路會剿

一李秀成股匪若由大洪嶺入犯祁門祁門老營堅守不動待鮑張派隊來援祁營再出隊夾擊

一李秀成股匪若由赤嶺樺根嶺內竄歸德鎮卽九年六月楊七麻子由景鎮竄回石埭七都之路也左京堂由景鎮發兵攔頭擊之祁門發兵橫擊其腰

一偽侍王輔王二股若分支由婺源竄樂平左軍攔頭迎擊張軍由尚溪口跟蹤追剿應由凱章派人將尚溪口婺源路徑一一看清並派人預先於中途坐探如竄樂平之賊不滿萬人則左軍自足了之張軍不必追剿

一左鮑張老營營部門老營均須深溝高壘多儲米糧子藥爲
堅守之計如附近二百里有賊均可派隊出打行仗打行仗之
法或帶鍋而不帶帳或老營煮飯挑送皆可

覆胡宮保

左帥來祁已兩日精悍之色更露議論更平實腦皮亦更黑侍
於皖南業已辦理不善然退張而進左差足下對皖人上對
聖主卽或難期速效鄙心亦自無憾惟皖南必須三支勁旅侍
到淮揚亦須有一支偕行現僅鮑左張三支陳鎮大富一支聞
弁兵皆不甚得力始終欠此一支侍不克迅圖東行實深焦灼

致王子槐

徽州數年以來幸得安謐國藩新接防務李次青觀察莅任八日遽遭此變使珂鄉罹此浩劫鄙人辦理不善且愧且憤宋滋久侍講現帶安勇與鮑張兩軍協剿日夕謀克休歛兩城柰偽王三人環聚徽境賊黨過多難遽得手竄深焦灼

覆楊厚菴

惠緘具悉陳鎮飢疲之軍須穩當行去以固其氣良爲至論已批令暫紮東流不必進紮香口俟江西解到餉銀子藥再行酌調至全軍盡移祁門則可不必祁門地勢極窄現在兵力儘足不可再添建德普軍殊不足恃必仗陳軍在東流庶建德得唇齒之依無意外之虞祈囑陳鎮軍單騎來此一會隊伍概不必

來渠三月解圍之案及秋月守城之勞可開單由敝處
獎陳鎮軍營制不甚妥叶請閣下就近指點令其改依楚軍營
制敝處新刻營制營規茲發去十本煩轉交陳公令其照改

覆歐陽稔岑

昨接惠緘尙未奉復深爲系念弟於中丞尙未識面礙難關說
應請閣下扁舟東來枉過敝營聊借子猷雪夜之訪以爲張儉
北海之行來示謂近年畏事避謗與官中絕無交涉果爾則不
久當有代爲剖雪者閣下昔年舌端或有彈射筆端亦頗刻酷
苟禍生有胎則亦不可不自省而斂抑也

覆胡宮保

初五日夕聞普營危急之信派隊往援限初十日趕到不知能
堅守待援否兩日焦灼萬分今聞陳鎮軍在東流獲勝爲之一
慰東建脣齒相去僅五十里普軍或可保全又聞多李二公大
獲勝仗北岸得手南岸亦爲氣王然安慶不克北岸之兵仍不
可薄防仍不可弛狗逆雖暫退不久又當來援南岸再勉支數
月以待北岸懷桐之成功可耳左帥自祁還景鎮渠部下新克
德興婺源兩城銳氣可用將來當成一勁軍也

致左季高

接稟報建德已失守查建德入江西有三路一由彭澤上湖口
一由石門至饒郡一由桃樹店至景德鎮其湖口一路弟已札

竹莊二營前往守城不知趕得及否其石門一路應請閣下派千餘人在彼防守其桃樹店一路爲祁門與景德鎮二處所必爭應請閣下派勁旅迎頭擊剿而弟處派人追擊其尾若賊據建德不動卽請貴軍進擊其米糧子藥半由祁門送桃樹店半由景鎮送去可也閣下卓裁行之

覆吳子序

前接惠緘裁復少稽弟自渡江而南洎乏善狀鮑鎮尙未到皖而甯國已失次青甯經蒞任而徽州旋陷不特不能提師赴蘇慰三吳父老之望卽皖南亦幾無立足之地又有南贛股匪飄忽北來連陷河口德興婺源經左軍屢擊獲勝甫得一慰而普

鎮又有建德之挫城池失陷一波未平一波忽起真有應接不暇之勢貴郡得黃太守嬰城固守遂得保全良堪欣慰弟入夏以來公事日多久荒書籍道味日減有退無進常用悚仄

批沈寶成

閃上地方不寬得十一哨又親兵十一隊儘數戰守布置須四路照顧不可擠在一處賊若來時當頭敵者須擇一好手窄路打仗勝敗全係頭敵數人若頭敵站不住後面雖有好手亦被人擠退了桃樹店等處多發哨探左京堂亦有探卒至桃樹嶺等處該營須與之常通信息歷口有全字營箬坑有靈字營其石壁等處須撥一哨顧後路否仰該將自行酌之

覆餗春選

閱此函知貴鎮之意欲向建德截剿賊匪吾昨誤疑休甯有
援賊也如得貴鎮親統勁旅出嶺以剿建德豈不大妙無如休
歙太后等處地方太闊賊勢太眾非得大枝勁旅不足以資防
禦貴鎮本管六千餘人又兼統張趙楊蔣蕭唐等四千餘人聲
威較大本部堂欲以攻休守黟防禦太后等事責成貴鎮一人
遂不復派貴部下分剿建德矣惟聞左京堂畱守婺源之兵已
調回景鎮休南一路太嫌空虛余前欲調張道老湘營移紮龍
灣五城及婺源等處正所以防休賊由婺源竄江西也茲聞江
軍門已至江灣若令其酌帶二千人專守婺城則老湘營仍可

不必移動本部堂再四熟商老湘營若移紮休南則藍田澗口處處空虛不特休北百姓盡遭塗炭且恐太平之賊竄入黔縣老湘營若仍紮休北則龍灣五城處處空虛不特屯溪之米糧不斷休邑永無克復之期且恐休歙之賊由婺竄江日夜焦思不得善策仰貴鎮就近會商張觀祭宋侍講等籌一妥法迅速稟復

覆宋滋久

江軍門新到弟已咨請督率王程各隊堅駐江灣屏蔽休南婺源等處其休北迪祥等處卽不移動以副閣下及紳民之望亦從鮑張二公之雅意也至尊意欲鮑張二軍急攻休城兩公皆

熟於戰守事宜除大調度弟處作主外凡打仗出隊進退緩急均由渠自爲主弟俱不遙制也

覆左季高

老湘桂勇尙未回鎮竇深懸系昨夜專人至尊處請不必分支賊鋒甚銳閣下堅駐以待其來如迪菴在武昌待石逆之法以主制客以弱伺強竟不移營進剿或有把握饒州婺源景德鎮三處請不必兼顧耳

覆張凱章

接惠書知已安抵葉村賊犯羊棧嶺又犯禾成嶺處處喫重現雷邏字二營在祁護衛禮字二營仍紮盧村不動宋侍講安勇

改紫漁亭與二老湘營二霆營聯絡駐紫漁亭爲中樞扼要之地請閣下親往指點一次總須深溝高壘立於不敗爲要此間三日不接左季翁信昨夕接江西省文數件浮梁之文報已通左軍必無恙也

覆左季高

鮑軍當赴景鎮本無疑義因接閣下阻止之信是以暫停未發江灣之賊若由婺源竄鎮計必先鮑軍三日而到敬求閣下靜守數日堅壁不出待鮑軍到浮梁時霆營剿西路建賊貴軍剿東路婺賊各有專嚮仍可互相援應如婺賊徑至樂平抄貴軍後路亦求閣下先顧景鎮老營待鮑軍到鎮貴軍再行赴樂聞

江灣之賊卽是德興河口兩處收匪以貴軍當之應有必勝之理但鮑軍未到之先未可輕出迎剿必須固住老營自全其軍千萬千萬至弟移營之說此閒眾口一詞弟思之至熟此時率鮑赴婺計已落賊之後且軍心搖動之際弟若輕動則軍民紛亂米鹽無買各軍皆不方便不若弟與凱章主守公與春靈主戰以待事機之轉尊意以爲何如

覆毓石坪中丞

此閒軍務冗雜刻無暇晷本月以來初一日婺源失守初三日東流失守初四日建德失守十三日浮梁失守十三日饒州失守十五日嶺外之賊破禾成嶺而入休甯之賊攻陷江灣營盛

十六日嶺外之賊破羊棧嶺而入休甯之賊攻陷上溪口營盤
竄屬風波疊起應接不暇幸左軍於初三日克復婺源楊彭暨
陳鎮軍初三日克復東流左軍十三日克復浮梁祁門所派唐
副將一軍十七日克復建德大局稍定人心稍安目下建德之
賊集於渠田石門等處意圖窺犯左軍江灣之賊欲由婺源竄
入樂平亦圖窺犯左軍左軍若有挫失則祁門之糧路已斷而
羣賊闖入江西腹地矣弟擬派鮑鎮率五千人至景鎮幫助左
軍分剿建德婺源之賊因羊棧嶺日開仗被賊牽制鮑軍二
十一日乃可起行二十四日可到景鎮也閣下調彭道平江營
至德興可與左軍通氣甚好仍請調養素之水師及孫昌國之

飛划防守都昌湖面恐賊由都昌偷渡吳城也總之江西之安
危水路須守住鄱湖不令偷渡四岸陸路須守住景鎮不令內
犯腹地則風波漸平矣

覆胡宮保

南岸兵事冬月以來風波大作危險萬狀頃有建德羊棧之捷
又聞江濱東流彭澤湖口諸城幸保無恙人心稍定只要嶺防
更無他虞卽派鮑鎮赴浮梁一帶與左軍會剿仰託福蔭或可
化險爲夷

覆袁午橋中丞

院南江北文報阻隔舍弟用油紙小字自安慶遞來閣下一書

並覆奏摺稿閱識深謀良爲佩仰承囑代催江西餉銀尊處艱
窘之狀弟所深知且歷年以來同心相印同病相憐斷無漠視
之理惟江西漕折一款戶部提京餉四十萬已解兩批十萬就
道弟新接徽甯兩防奏提江西漕折每月五萬據報頭批四萬
起解中途賊氛梗阻尙未到營日內皖境之賊大舉上犯江西
如鄱陽都昌浮梁等縣處處有賊廣饒九南四府皆不能辦漕
省垣大爲震動釐金頓爲減絀不特尊處指撥之款難以如命
速解卽戶部四十萬亦恐將停解矣弟從皖南進兵原欲屏蔽
江西以保餉源今皖南旣已糜爛而江西門戶又有岌岌不克
保全之勢寸心自問慙對江西官民不能爲閣下代催餉項代

乞鑿堊待此番風波少定必當緘商省垣爲尊處海瀾之助

覆彭雪琴

頃得專差惠緘黃文金以死力奪我湖口麾下督率水陸登陴
固守保全危城實屬非常之功莫大之幸應商事宜條復如左
一建德雖經克復尙無兵力防守且該邑當處爲羣賊之歸路
不必堅守也陳餘菴擬派兵日日至建德梭巡輪流更換不必
駐防旣通祁門文報仍畱羣賊歸路其法甚妥業批准矣餘菴
部下千五百人守湖口者應仍畱湖口不必調回東建
一普軍潰勇令鮑公收集另編新營普鎮已奏參革職擊問將
來定罪復奏時次青輕而欽堂重總求允當以順人心

一黃文金大股全竄景德鎮左公憑河而守鮑公率馬步六千人赴鎮會剿不知能大挫凶鋒否

覆胡宮保

惠緘敬悉此間之賊全萃景鎮誠如尊慮而休甯歙縣及各嶺之賊亦殊不少前日兩路賊撲漁亭數近三萬蓋偵知鮑公已赴景鎮也日內漁亭與各嶺之賊必有並舉大犯之時此間以靈四副營守漁亭凱章守黟縣禮字營與江軍門長貴守各嶺不知足支持否唐桂生守祁門亦殊單薄鮑左以全力打景鎮雖蒙無把握然兵力已盡於此但祝日內左鮑與黃文金痛打幾仗而婺源一股尙不遽至景鎮則事或可爲耳

覆毓中丞

大疏拜讀數過忠愛之忱溢於言表至以爲佩景鎮賊目黃文
金挾四五萬之眾銳意深入斷敵處之糧道擾江西之腹地幸
楊彭水師克復東流彭澤鄱陽都昌數縣又協同竹莊保金湖
口最要門戶厥功甚偉左季翁堅守景德鎮以新軍當大敵尤
不可及弟派鮑公率馬步六千回援景鎮或可將黃文金一股
擊退惟婺源又有大股圖竄江西又聞石逆分股竄至湖南桂
陽亦有併入江西之意一波未平一波迭起賊眾兵單殊難支
持現請左季翁添募三千鮑春霆添募二千四百不知何日始
能成軍此外實無勁旅可調省垣及撫建廣信四城總須預講

守城之具預籌守城之將處處能堅守十日半月又有游兵進擊賊必不能逞志於江西也

覆張凱章

春遷到景鎮賊即退去六十里踞硯田街地方日內雨雪紛紛想未開仗餉銀八萬已至景德爲賊所阻今幸運道大通一面緘請左季翁派人護送一面由祁門派人迎接尊處必發一月滿餉決不爽約婺源一路之賊已竄至開化之花埠或抗拒威坪之浙軍或竄擾江西之河口尙未可知但目前不遽至景鎮與左軍爲難耳漁亭八營濠牆究竟堅固否國藩時時系念請閣下便中再去細看一次盧村禮字兩營聞濠牆甚屬堅固差

可放心曹冲岡地方擬派人輪流放哨以安行旅

覆左季高

昨接惠緘又接大咨曰內兩雪嚴寒公軍與鮑軍分途追賊士卒勞苦異常可念也此間嶺防日日有警江軍門新管各嶺防務其人甚乎民望且要體面或者足資守禦尚溪口之賊昨日竄至烏門烏門距祁門五十餘里距漁亭四十八里曰內祁漁兩處或尙有事此時鮑軍只宜將鄱都等處之賊逐出建德一氣掃清斷無分營回顧祁漁之理但求鮑公速了鄱建一路貴軍穩紮鎮敵處當堅守以待事機之轉耳曰內追賊情形乞示一二以慰懸懸

覆左季高

書札卷二十三

五

惠緘得悉鮑軍業已渡河黃文金隊伍甚整不知鮑公能慎以圖之否金陵逆首調各賊往懷桐救援日內聞徽休之賊紛紛應調赴下游渡江以救安慶漁亭葉村等處戰事或可少息羊棧大洪各嶺外之賊亦少退祁門之北聊可偷安東一支爲僞忠王所帶竟不分赴北岸救狗逆之急玉山廣豐城均可慮但願閣下與鮑軍將西支黃文金一股擊退驅出建德境外然後能抽出一枝游兵回剿江西腹地耳蕪泉六千人之請尙未接到做處纔去一檄令其募足五千人大約蕪泉之能來與否全視乎蔭渠中丞之堅留與否閣下與蔭渠爲道義金石之交如

能屢商而定然後以一片奏定乃爲妥善否則諭旨允而
蔭公不許仍屬無益去年奏調蕭軍幾成嫌隙可爲鑒也

覆彭雲琴

湖口爲黃文金傷心之地雖經擊退難保不再往攻撲陳餘巷
千五百人自可少緩調回蓋建德不過文報經由之路湖口則
尤鎖鑰必爭之地也竹莊千五百人已令添募足額鮑鎮至景
鎮後尙未開仗雖由雨雪耽擱亦失之過於持重耳羊棧嶺外
之賊退竄石埭蕪因金陵逆首調休歛之賊赴援懷桐嶺外賊
勢少孤李秀成一股自婺源竄至玉山不知廣信玉山能保全
否

覆左季高

接奉復書貴軍須走右路而兼顧中路鮑軍須走中路而兼顧左路此一定之理勢貴軍老營尚在景鎮卽以留鎮之兩營爲根本鮑軍稍向左向前又以貴軍爲根本兩軍兵力均不甚厚只能各打一路不特貴軍不可分支卽鮑軍亦不可分支賊之布勢太寬我軍人數較少不可作一網打盡之計賊若來包抄凶悍者當在右路石門一帶其桐子渡之賊防我饒州進兵也張家嶺之賊防我湖口進兵也陳家衝之賊該逆自保歸路也鄙見臆度如此閣下如以爲然請與鮑公熟商先儘右路無遺深入建德瘠苦非常擴無可擴賊之米糧運於二百里以外我

之米糧去水次不過數十里我可持久賊難持久此次慎以圖之新年則可放膽行之矣

覆左季高

台旌已進茅屋嶺雨雪泥濘日內不能開仗士卒過於辛苦閣下帳棚大小亦必思所以變計耐勞固爲吾輩立身第一義然必稍稍完具足以禦寒足以安寢庶幾可繼之籌擬仿照弟帳棚之式爲閣下製二架弟帳卽迪希兄弟之式亦尋常人字帳特稍大耳進兵之路來示與弟前信尙屬相合祈細告春霆也

覆左季高

賊若退至建德張家灘一帶終非了局應請貴軍會同鮑軍前

進總以追賊回池州石埭而我奪得建德張家灘爲安一交新年楊逆必悉銳上犯鮑陳兩軍穩占張家灘香口兩處利則由殷家匯以進池州卽不甚得利亦當堅守香口建德張家灘三處以爲羊棧等嶺之外屏庶祁黟嶺防得少紓也景鎮係貴軍基業務請速修碉房至要至要馬隊本不可少柰目下無馬可購敝處派五人攜銀至張家口買馬尙未歸來各營瘦馬無可換者焦灼之至待與潤帥商得購馬之路再請貴軍添練馬隊也

覆左季高

敝處劈山什長是峙衡舊用之周光正故主稻草團子之說大

子合膾者最難太緊則恐餽塞於膾內太鬆則不能及遠故鄒
見不喜用封門大子不獨劈山礮即大礮亦主此說雪琴不謂
然也此間久不得江北消息焦灼極深惟有自水師來着道安
慶樅陽無恙而已

致王霞軒

正月之餉昨已專札調十二萬聞已有三萬起解在途合之得
十五萬爲數不爲不多而實不敷一月滿餉現計每月須銀十
八萬有奇而左軍在外陳軍在外吳軍在外餉軍新添之二千
四百在外新調之蔣香泉魏喻義李金陽等軍皆在外實不知
所以善其後然今年春夏江西皖南必有無數大戰危波迭起

不得不多募多調支撐半年安慶克復卽有轉機矣祈爲我婉
求各署同心護持以保危局至感至禱

致左季高

大洪大赤二嶺卡均被賊破大洪嶺在祁北六十里江軍門帶
隊往堵不知能禦否大赤嶺守卡者係黃副將惠清此外尙有
守樑根嶺馬復震一營守閃上楊芋菴一營皆新營未必可恃
賊或竟犯祁門或犯景德鎮皆不可知特此飛報祈閣下與春
憲妥爲預備總以保全貴軍保全鮑軍保全景德鎮三者爲要
不必計及救援祁門也

覆胡宮保

接奉賜書知玉體稍就康復嘉賓滿座軍事平穩至以爲慰此
間撲祁門之賊經唐桂生剿退已全數遁出嶺外目下嶺防肅
清惟左鮑與賊相持似皆憚於賊勢之浩大未敢下手欲求北
岸濟師又深知無兵可撥然賊勢則南盛於北遠甚

覆李少荃

新正六日賊分兩路破大洪大赤二嶺而入大洪嶺經江軍門
派隊堵住大赤之賊初七夜宿歷口初八日直撲祁門距城僅
十八里唐桂生帶湘勇千八百人禦之於石門橋幸獲大勝追
奔三十餘里賊之馬匹器械旗幟拋棄殆盡初九日再出追剿
則賊已於先夜全遁出嶺而鮑鎮在洋塘亦於是日大獲勝仗

賊壘二十餘里一夕盡遁自十一月初以來危險萬狀至是微陽始回稍有生氣矣玉山二次被圍又已擊退實可嘉尙若廣豐亦能堅守則江西北境藩籬一律完固亦幸事也

覆左季高

一建德之賊不知果退盡否如果退盡擬請鮑鎮全軍紮張家灘陳鎮一軍分紮東流建德二縣待紮定後鮑公派隊鵬剿香口丁香樹田家樂等處邢門亦派隊出嶺會剿須將各嶺搜剿淨盡鮑公進圍池州弟亦出嶺駐紮香口張家灘等處但恐鮑公未進池州之先賊又率大隊上犯耳

一貴部追賊過張家灘後自應調回景鎮略與休息一面在景

鎮速修砌座一面派千五百人進守婺源城婺源雖在萬山之中名區也城小而堅地廣而物眾每年茶稅正餉鹽釐可得二十萬金貴軍以景鎮樂平爲後路以婺源爲家私必可立於不敗之地在貴軍則根基甚固在大局則屏蔽甚廣目下兵力不敷至二三月則添募各營可到貴部共得萬餘人除以千人畱景鎮千五百人守婺城外尙有八九千人進攻徽州自可指麾如意

一李秀成破江山常山後不敢進攻衢州其膽其力均可概見兩次圍玉山不能攻破若往廣信屈鍾之力亦足禦之若破廣豐河口而不破郡城玉山當亦未敢長驅深入若廣豐亦堅守

不破則斷不深入矣刻下貴部全軍尙在景鎮修柵之際且靜觀以俟其變撫建皆尙有備賊卽深入或亦不遽逞乎

覆鮑春霆

接惠書知追賊已至永豐鎮青山橋等處想彭澤之賊亦易剿辦如彭澤建德一律肅清請閣下全軍駐張家灘另有照會送閱須將各嶺外之賊搜剿淨盡靈字新四營募練成軍再行進圍池州若彭建二邑尙未肅清則請閣下相機進止不必遵照會行事也閣下嚴誠貴部不可驕矜常守花未全開月未圓滿之意至囑至囑

致毓中丞

正月六日賊分兩路破大洪大赤二嶺而入經江軍門堵截唐副將力戰化險爲夷亦有天幸鮑公泮塘之戰聞殺賊亦不甚多而逆黨數萬一夕奔潰頗出意料之外敗賊分爲兩股一股由建德下竄青陽一股竄至彭澤鮑公跟蹤追剿若能逐之至池州以下則江西之西北可就肅清玉山廣豐解圍之後賊匪猛撲信郡屈鍾嬰城固守若能保全該郡則江西之東北可就肅清撫建防兵無多未可輕易撤動江省東路總欠游兵一支若能籌出一軍往來游擊於撫建廣信河口之間則各府防兵不輕調動更形周密矣

廣信解圍李逆竄入吳坊陳坊等處可由金瀘以竄撫建亦恐其由東鄉進賢突犯省城圍江西以救安慶卽上年圍浙江以救金陵之故智也國藩已商右翁截留李金賜魏喻義兩軍助守省城又檄雪琴派水師一二營協守省河惟魏丞新有添募之議恐不能迅速成行現備飛札催之由驛遞長沙閣下兼理驛傳務祈加意整頓南昌至長沙能五六日趕到爲妙閣下在江日久眾心翕附所有省防事宜亦望毅然自任至禱

覆左季高

惠書敬悉下隅畷之賊旣非黃李大股則鮑軍應足了之日內久不得渠信不知建德張家灘果不至被賊久踞否上清宮一

股撫州府縣稟稱已竄陽田陽田去金谿僅四十里江西別無一枝勁旅足以禦之弟昨欲請費部回援撫建蓋亦迫於無可如何此間眾議不以爲然凱章一軍獨駐祁門亦慮不足以當三面之賊東不紫漁亭西不紫歷口則祁門難以獨全不進葵源則坐失自然大利而將來亦無進兵之路不援撫建則腹地糜爛餉源立竭不保建德則江濱之門戶不固北岸之聲息不通此四者皆要緊之著而力不能兼顧何棄何取孰先孰後務乞閣下詳示兄近於大處調度不甚置辭似存一番客氣此斷不可一着之錯全局皆輸務乞將目下調遣將來局勢一一示我馬隊請公自練尊處需費弟斷不惜請放手爲之

覆楊厚菴

淮揚水師各營船已造成礮亦將到自應令其招勇操練而餉項十分支絀無可設法意欲於華陽鎮釐金項下通融若干專以協濟淮揚水師俾得趕緊招勇請閣下與琴熟商如荷允許每月可濟若干一面見復一面告知黃昌期飭各營招勇倘協濟之數無幾或每營令十哨先招十哨緩招請閣下與雪琴昌期商定辦理將來操成後駛赴下游卽在淮揚一帶籌餉不必再支華陽釐款矣國藩已辦銀一萬兩專備昌期等前赴淮揚途費之用目下招勇是否卽需解往應用抑或不遽扯動亦請閣下與雪琴昌期商定見示

覆左季高

接惠書知將爲婺源之行何其神也正思請貴軍赴婺弟見事每遲計尙未決而閣下恰爲此行實爲心折汪村大股聞將分兩路來犯祁門或由平鼻嶺清華街以犯婺源亦意中事台旆駐婺源不特伐賊由婺源江西之謀并使汪村竄伺祁門之賊亦且狼顧而恐貴軍之議其後此次閣下入婺數美咸備特慮賊或先到一步耳建昌之賊圍城五日環攻未息可危之至專慮由瑞臨竄潯識微見遠弟當告潤公由此著眼也解散脅從及鮑陳餉項一事決當盡力

致毓中丞

建昌之賊人多而頗悍志在糜爛江西之腹地以解安慶之城
圍聞建郡北門外登高山已被賊占踞危險之至萬一疎失回
屬全局震動即幸保無恙亦恐其由宜黃樂安竄至贛河西岸
撥犯瑞臨以掣湖北之兵勢弟前已檄雪琴派水師協防省河
本日又札孫昌國防樟樹等處河道盜賊蹤飄忽不得不早爲
之所也蔣薌泉一軍聞粵西已清可來皖南支持至三四月則
江西皖南皆安穩矣

曾文正公書札卷二十三卷

曾文正公書札卷二十四

覆劉印渠中丞

來示稱謂過謙萬不敢當以後望弗再施至感至囑薊泉究可
來皖否國藩與左季翁在此兵力亦不甚單柰賊多地廣不敷
調派近日江西建昌府城被圍晝夜環攻危如累卵該郡甘餘
萬百姓皆入城助守若有疎失則劫數極大江西固全局震動
湖南亦處處宜防敵處竟無一兵可以往援愧恨之至薊泉若
可移師江皖請閣下斟酌情形奏明辦理敵處不再具奏恐粵
西蹙不能少此軍也希菴新拜安徽巡撫之命皖事當有轉
機然糜爛太久股數太多下手實不易

覆胡宮保

惠書敬悉英山既失則二蘄難保楚疆大震幸希軍以節制之師當賊馳驟虛憍之氣一二勝仗後或可轉危爲安待本擬日內移駐江濱因左軍在婺源與大股悍賊相持應須局勢稍定侍乃能移出山外鮑公一軍將來總宜渡湖赴潯恐建昌賊鋒由樟樹而指瑞臨也

致鮑春霆

頃戈什哈自京中回言京城及沿途道閣下威名甚好至爲欣慰惟望閣下常守花未全開月未圓滿之戒不稍涉驕矜之氣則名位日隆矣胡宮保聞撫建有警隨止閣下不必往援北岸

甚好甚好請閣下卽防守江邊東流建德一路婺源來大股賊
十餘萬左軍全行進剿現調陳餘菴帶四千人速來景鎮餘二
千人在東建請閣下代爲照料

覆胡宮保

楚疆之警與七年之上巴河八年之麻城相似希菴應能了之
公玉體未痊不必過憂也此間軍事左軍至婺境猝與楊逆股
匪相遇獲勝一次侍派凱章及朱唐攻上溪日獲一大捷破賊
梁三十餘坐一則乘虛思取休甯二則襲清華街股匪之尾使
楊逆狼顧其後也日內尙不能移營

覆彭雪琴

荷承閣下與厚菴慨允以華陽釐金概歸淮揚水師卽日當札
飭各營開招黃昌岐之統領關防亦卽刊頒成發翔旣調赴上
游救援鄂境僕已面諭任星元開赴江西省河協防矣建昌一
股若由樟樹渡至瑞臨則數省之憂也鄙人移駐東建業經入
奏目下尙有不能左軍與楊逆相遇於婺源正在喫緊之際敝
處派凱章朱唐攻上溪口休甯等處掣婺源之賊勢也

覆胡宮保

賊已入蘄水界至爲焦慮然四眼狗實非李多之敵此外別無
凶悍頭目北岸事猶易於南也張朱唐攻休甯未能得手而受
傷頗多左公與大股悍賊相遇景鎮空虛現飛調陳軍往駐之

建昌園困如故有休甯名醫葉某現居樂平專弁虔請來祁與之一談再送至太湖爲公診視作梅學道多聞而其醫理地理侍御不甚佩服以其高妙而稍稍蹈空也

覆張凱章

接來示知休甯已克皆由上溪口猛打之效欣慰無旣徽州府城之賊或亦可遁無論其遁與不遁休甯易守徽城難守終可爲我所有也目下所慮者僞侍王在婺源與左軍相持賊多兵少恐有疎失或往援婺或不往援婺二者請閣下卓裁如往援婺則閣下帶八營由上溪浙嶺而赴清華畱一營於漁亭輜重全畱漁亭唐桂生帶三營守漁亭慶宋六營守休甯城可也如

不往援發則閣下一軍分守休城葉村兩處或專守休城襲宋六營仍守漁亭唐回祁門二者請酌裁迅速示復

致左季高

休甯克復屯溪上溪口等賊巢皆已走盡看來徽郡亦可克復大局略有轉機惟念尊處賊多兵少面面受敵實深懸系台旆駐樂平景鎮扼要之區不知與毅卿一軍隔絕否如事急併軍可自全也全軍爲上保地方次之陳餘菴處已三次緘催可到景鎮然非能助戰者恐不能有裨於左右耳

覆宋滋九

休邑克復大局似略有轉機我軍如能堅守休城賊斷不能久

踞歙城目下郡城收復或易設守則難鄙意在以全力守休城也

覆張凱章

台旆已入休城更棚完固器械甚多忻慰無已請貴部卽守休城認真布置此城旣得可爲皖南各城之根本可爲閣下非常之偉績歙城之攻與不攻得與不得無關緊要其地勢與城濠遠不如休城之好守也

致葉峻山

休甯克復是皖南一大轉機貴營功績甚偉至爲欣慰徽州府城遠不如休城之堅固地勢亦不如休邑之雄秀只要堅守休

城不過一半月徽賊將不攻而自退目下老湘營將赴婺源夾擊清華街之賊所有休城防守事宜責成閣下四營專辦

覆胡宮保

黃州失守武漢危急不謂事局糜爛至此南岸亦極決裂左公分八營在甲路者營盤失陷建昌援兵再挫府城恐不能保江西省城渙散之至張方伯赴潯料理洋商事件李輔堂告病請開缺回籍人人皆懷寇至卽去之心可危可憂吾二人親見楚軍之所由盛恐不幸又見其衰言之慨然

覆毓中丞

官軍大破上溪口賊巢克復休邑城池正在得手之際本擬進

攻徽郡不料左軍分八營在甲路者被賊圍營潰退黃港地方
不知與左公自帶之四營會合後尙能站住否弟於初八日附
奏移駐東流建德騰出鮑超援剿皖北援剿撫建云云茲左軍
旣挫饒景浮梁萬分危急則鮑軍又當先援景德鎮矣湖北之
賊已破黃州武漢大震時局變換至此恐今年春夏又將如去
年蘇杭之奇警迭出也建昌官紳竟能守至二十餘日之久可
敬可感而亦可憫弟處自顧不暇竟不能撥兵援建愧憾何極
輔堂兄具詳告病自應批駁慰留時事雖危如累卵而江西省
城吾輩仍當竭力保守若江西疎失則湖南亦斷無獨全之理
弟當作函婉商之

覆鮑春霆

敝處發一公文調老湘營赴婺源協助左軍又發一公文請黃營赴景鎮樂平協助左軍蓋聞左部下八營在甲路挫敗也今日探報甲路八營因子藥缺乏而退尚不甚敗若歸併左公自帶之四營尚站得住閣下已移紮張家灘勢亦不可遽動如左公在景鎮站得住則陳餘菴四千人可往助之虞前將四營亦可發往助之台旌可不必前往景鎮樂平矣竊軍爲賊所憚目下望援者三處一太湖胡宮保處有急須援一景鎮左帥處有急須援一安慶舍弟處有急須援而鄙意總不欲貴重輕動專雷待援九江瑞臨之用三日內再有確音請暫勿拔動

覆胡宮保

一左軍八營在甲路挫退者有三營已至是鎮與左公會合其五營亦可歸併或站得住侍再調餘巷四千至鎮助之

一建昌城轟塌已經堵住撫州兵援建者挫敗賊即跟蹤來撫以人事決之撫建萬無保全之理鮑公一軍即日須由湖口渡江由九江進保江西省城竟不能作他用

一來示以賊匪上犯引爲已罪此豈公一人之咎去年定計以多圍桐城舍弟圍安慶係多發之而公從之希軍紮青草塌爲游兵係侍發之而公從之厥後上巴河本有鮑軍以固內防而侍調赴南岸是侍之咎也公自英山移駐太湖未畱一軍防英

則公之咎也侍咎較大公咎較小余將在翟不能堅守十日半
月以待援則咎更大矣

一侍本擬十七日拔營赴江濱因左軍新挫人心震動尙須小
停

致張凱章

頃接探報申路之賊竄至德興內犯江西等語查申路之賊若
犯江西可由富村以趨景鎮亦可由中雲以趨樂平不必由德
興迂道入江今既竄往東路必是因休甯已破僞侍王由華埠
馬金嶺等處回保徽郡或再窺休甯也休甯城池堅固防守甚
嚴不患賊直攻休甯而患賊之先攻漁亭漁亭兵力太單應令

婁副將等寔字四營暫置祁門如果景鎮平安寔營仍回漁亭
與副中營會合防守所紮營盤專防上溪口一路爲最要應令
冒雨興工趕緊修築仍多發探卒探明僞侍王一股是否已回
徽郡並探上溪屯溪龍灣江灣等處賊蹤多少此時我軍不急
於攻徽州而急於守休邑亦不急於守休邑而急於防漁亭穩
守一月徽州之賊不攻自退矣應否如此尙祈斟酌

覆彭雪琴

接惠書知台旌已帶水師上援武漢甚慰應復各件條列如左
一江西建昌危急萬分并分股攻撲撫州省城大爲震動現飛
調鮑軍由湖口南康赴江西省先顧根本次援撫建賊撲撫州

明書林卷三十四
十一
係十二日事鮑軍至省不知趕得及否

一國藩本擬拔營移駐東建因僞侍王由婺源竄犯景鎮樂平左公部下八營小挫恐景鎮有失糧路一斷則祁黟三縣之軍心必亂故暫留祁門木忍軍士圍困而已獨出險也

一武漢爲水陸各軍之根本目下鮑軍旣援江西則不特賊撲集賢關鮑公不能往援卽賊撲太湖撲鄂垣亦不能往救寸心憂而且愧惟仗希蕃與閣下水陸救全武漢西望神馳

覆張凱章

休賊無故宵遁歛賊必大不以爲然目下正在愧憤激厲思爲力戰報復之舉我軍但當堅守休甯漁亭兩處不必遽攻歛城

亦不必尋賊開仗歛城之賊必不敢來攻若發樂之賊必仍踞
上溪來攻漁亭攻一二次不破徽城亦不打自退矣鄧兒所策
如此不知閣下以爲然否閣下守休甯僕極放心唐桂生守漁
亭僅湘勇三營淮勇一營自嫌力薄敬求閣下撥兩營駐紫漁
亭協同唐軍防守至感至荷湖北上犯之賊尙在黃州及巴河
一帶撫州解圍建昌尙未失守郭守式源自河口帶三千人赴
建救援計早到矣

覆胡宮保

北岸事本非不可爲者惟省城臨警招勇希帥自巴河南渡二
耆殊不愜人意成敗有天聽之可也鮑軍蹇不晉江西省萬一

賊撲安慶之背鮑可渡江援之多亦可援若圍攻太湖多鮑亦皆可援但須大股圍撲一二日然後調鮑軍渡江預先北援則不可

覆宋滋九

接惠書知安勇小挫貴體受傷數處至爲系念休城旣復歛人亦思速克郡城言歸邦族此自人之至情閣下進紫前敵以答珂鄉父老責望之殷亦情勢所不得已第安勇之不可恃正月十六之役業已虛襄畢露古人云知己知彼百戰百勝閣下與安勇相處數月而迄不知其不可恃是知己也所有各營安勇應節盡行遣散閣下靜心調理俟傷痕痊癒或留於老湘營

或在敵處與辦再行裁酌

覆胡宮保

接手敎武漢無恙北岸漸穩可慰可慰此間鄱陽樂平一片賊勢蔓延而撫州業已解圍遂止鮑公省城之行恐須回剿饒州不復北渡矣賊破樑根禾成方干三嶺而入禾方二嶺之賊經江軍門擊退樑根之賊今日竄至歷口明日須出隊往攻嶺外羣盜如毛蓋無日無虎尾春冰之懼也

發統中丞

兩次愚誠敬悉壯章等新募千七百餘人畱防省城又有水師防衛省河會垣重地應保無虞建昌似有解圍之信尤以爲慰

此次建昌苦守二十餘日做處不能派一旅往援且愧且憾無地自容無辭自解然此閒節節危險實亦有驚心動魄刻難鬆勁者閣下如見省城業已安靜則請飛函左鮑二公會剿饒州李世賢一股至要至要休甯克復守備已固方干嶺禾成嶺樺根嶺三處同被賊破卡而入今日由祁門派隊進剿不知能得手否

覆左季高

官兵之少於賊不倍十倍豈惟閣下懊懊不敢輕視弟亦何嘗須與不懼現在省城既留陸章等新軍撫州賊退建昌亦有解圍之信南路甞可少安鮑軍似可由石門等處迴剿與貴軍夾

攻鄱陽之賊若賊已渡昌江北岸尤應以鮑軍攔頭擊之

覆張凱章

徽賊來攻閣下靜鎮以待不問城接仗故示以弱以爲他日進
攻之地甚善甚善嶺外之賊破禾戍方下樛根三嶺而入朱雲
崖出隊往剿赴休之約須改期也左翼五旗請令其即日移駐
漁亭漁鎮爲休城接濟之路所關最重望無以上溪無賊而遂
輕忽視之

復胡宮保

武漢無恙鄂餉不至盡絕事或猶有可爲也此閒犯樛根嶺之
賊宋雲崖擊剿獲勝逐賊出嶺惟僞侍王大股蔓延於樂平鄱

陽等處祁門景鎮之糧路已斷現調鮑軍回剿已咨達冰案省城文報因路梗不通不知撫建一股已至瑞臨否

覆彭雪琴

武漢無恙閣下與希帥先後趕到至慰至幸江西建昌撫州皆已解圍省城亦平安大局似尙可支惟盼希帥將黃陂黃州一股掃清左帥將樂平景鎮一股打退則南北兩岸仍可轉危爲安國藩本擬移駐東流因僞侍王大股廬集於樂平鄱陽景鎮之間祁門餉道不通祁夥休三縣軍心慌亂故蹙未移動現調鮑軍夾擊鄱陽若掃清此股餉道疏通鄙人當移駐江濱與水師相依倚休甯克復樺根嶺之賊擊退日內擬進攻徽州一次

致張凱章

攻徽州稍易則景德鎮更難萬一不能攻開請閣下在富塢再駐一宿竭力再攻蓋各處皆死路惟破徽是一條生路也

覆鮑春霆

連接惠緘知貴軍尙紮下隅坂頃據左京堂信知陳餘菴軍敗挫景德鎮失守左軍還駐樂平矣景德鎮係僞侍王股匪賊數比黃文金更多貴軍進剿郡陽不知已啟行否紮營之地總須算明米糧接濟之路距水師不可太遠至囑至臨國藩日內自至休甯飭各軍進攻徽州若能克復徽州則令各營堅守徽休祁等城而僕以輕騎自赴江濱若不能克徽則各軍皆當分途回

剿僕亦當赴江濱耳

覆左季高

在休甯接到兩緘一報貴軍廿九日之捷一報三十日陳車之挫景鎮之失具悉一切弟至休甯飭各軍攻徽州若能克徽郡則浙江可通米糧子藥之路當令各軍堅守徽休祁各城而國藩以輕騎自赴江濱若不能克徽則當以強兵回剿景鎮之賊而國藩率弱兵以赴江濱貴軍之捷係去年廣東之賊新附髮逆者乎抑係僞侍王部下乎究竟僞侍所部強者若干能得其要領否去秋次青敗後盛言僞侍凶悍無敵弟方不深信湧山桃林二役閣下身在行開究竟何如務懇示以端倪至要至要

與朱雲崖

石壘之法約二丈二尺高在土內基址砌四尺出土外者一丈八尺厚如傾敦仁礮之式一丈以上安門門上不過一二尺耳大可容一哨人合勇夫不過百二十八人斷不可再大內作四艙火藥艙水艙上不住人子彈艙米鹽艙上可住人牆不甚厚則守塚者無子牆可站宜於砌至丈五六尺時用橫木砌於磚石之內架板於橫木挑之上如棧道然以備站牆之用

覆鮑春霆

昨日緘請閣下回剿郡陽進攻景鎮不知已接到否此股若不擊退不特鄙人與三萬軍士同在圍困之中且恐其由都昌渡

湖以至吳城則省城九江瑞臨等處糜爛爲禍尤烈貴軍至鄱陽則下可以保都昌上可以攻景鎮外可以解祁門三縣之圍內可以紓江西北路之慮特具公牘達之左右祁門三萬餘人二月全無餉來聞有銀四萬在轉運糧台張守秉鈞處請閣下設法解至桃樹店等處祁門派隊迎接可也

覆毓中丞

久不接來信忽於梗阻之後得此雲章如獲至寶此閉自聞僞侍王大股蔓延樂平鄱陽一帶祁門日有圍困之勢弟自率諸軍由祁門出隊至休甯攻剿徽州冀圖打開一路以通浙江米糧之接濟不圖甬經出隊卽聞陳餘菴軍敗景德鎮失守之信

及進攻徽州唐桂生一軍小挫傷亡二百餘人兩處之接濟皆斷弟所統各軍在祁黟休三縣者四面圍困不得已檄鮑軍回剿鄱陽進攻景鎮聞僞侍王一股人數倍於僞忠王一股凶悍亦遠過之若鮑軍不在都鄱一帶恐賊由都昌渡至吳城則省城九江瑞臨處處可危較之由樂平內犯撫建爲禍更烈也是以決計請左鮑併剿僞侍一股外以解祁黟休三縣之圍內以紓江省北路之患如天之福能將僞侍一股擊退然後回剿僞忠一股庶有把握耳

覆張凱章

接來信知昨日有騎賊百餘來犯并未接仗閣下擬將西北伏

賊提盡再進東路極是極是軍事瞬息千變僕一切均不遂制
惟有兩言叮囑一曰隊伍宜整一曰出隊宜晏恐已刻變睛爲
雨也

覆胡宮保

接惠緘鈔示鄂省及霍山各信鄂事漸漸平穩德黃雖失究非
驚宵之症請公少寬以保玉體此閒抽祁門老營之兵攻徽初
五小挫初十再進大約十一二可開大仗現在四面梗阻僅建
德尙有一線之路可通文報若鮑公不速進兵力攻則建德并
梗卽在目前請閣下代催鮑公專攻景鎮無二三游移也左公
在樂平可由婺源通信至休甯茲將渠初四日來信鈔呈一覽

覆李少荃

此開自二月中旬糧路已梗至景鎮失守則與左季翁文報不通目下四面被圍僅建德一線之路文報可通若鮑公不急剿鄱陽別郡建景鎮之賊聯爲一片敝處祁黟休三縣便在重圍核心之中鮑軍現不知已抵何處請閣下代催速攻景鎮爲荷僞侍王一股較之僞忠王一股更多而凶悍過之若不在鄱景擊退則西可由都昌以渡吳城東可由萬年以達撫建爲禍更烈請閣下詳告中丞及省中諸公審明緩急共支危局省城有張運桂劉勝祥兩軍合之前此兵勇計四千餘人根本當可無虞

覆左季高

徐兆熊攜到初六辰刻慰書具悉是日出隊徐弁言初六日晚
開徧傳尊處獲勝仗也弟決計守黟休祁三縣一面進攻徽州
一面請尊處與鮑公夾擊景鎮冀得解此重困徽城賊多而狡
恐難得手景鎮乘閣下屢勝之威益以鮑公夾擊或可驅逐出
皖弟惟堅守以待而已

致朱雲崖

前夜之挫想已聞其詳矣現在兵力雖不能戰尙可以守二
月之內或左鮑克景鎮或舍弟克安慶紫萬人於建德紮二千
人於桃樹店必有轉機所有應商事宜開列於後

一余回祁門不住舊處或住河邊石碕之內或另修石壘總宜
迅速修成請閣下經理

一北門四壘閣下現住之壘宜縮小多半其後面就舊牆其前
面至瓦屋而止所有火藥簣及內銀錢所皆應圍於壘外閣下
所統四壘愈小愈好另於西門南門修四小石壘亦請尊處撥
人守之愈小愈好極多不過一哨人少則五六十人足矣

一余住碕不過帶親兵戈什哈五六十人其親兵營另修牆
子

一唐桂生兩挫之後難以自振現調靈字三營紮漁亭恐漁亭
疎失祁休中隔也

致李申夫

接惠臧喘鄙人回祁意甚肫切惟此時以安危較之休祁兩處
正復相等休東防徽州北防太平兩面受敵祁北防禾洪西防
赤樛南防禦鎮三面受敵祁僅雲部二千人皆新挫之餘休有
凱部四千人新挫者三營完好者六營子藥則祁多於休米糧
則休祁相等休城修整頗固祁城刻刻可危而壘亦不甚可恃
鄙意請雲崖爲我修一堅壘或后柵后壘有一成者再行回祁
非好自處危地也正謹慎求穩着也祁有可恃之壘則速歸矣

致左季高

數日不接惠書正深懸系今日有勇自婺源來言沿途逃出難

民甚多皆言貴軍在樂平大勝被擄者均得逃歸爲之一慰此
閒攻徵各軍又挫一次賊氛大長現在斂兵爲堅守之計專勝
貴軍克復景鎮乃有轉機景鎮如克應請貴軍迅速跟追力奪
婺源賊若不能占婺邑之堅城則可不再踞上溪口再踞屯溪
而徽城仍可得手尊處當此大敵苦戰之後如能拚擋速進則
以千餘人進婺源六千人進屯溪上之上者也若太疲乏不能
遠行亦須速進婺源爲妙若目下正在相持之際則須待紀軍
來以收夾擊之效

覆毓中丞

接奉惠函久不得手示此次如獲至寶應復應商之件分條奉

布如左

一省門現有劉勝祥一軍張運桂一軍人心安定買賣照常極
慰極欣飽軍目下不能赴省祥營自當留省不可回信州矣聞
已飭添三百六十人應請再令添募百四十人弟前此已面允
其添五百人也該將帶千餘人儘足勝任至張運桂之千人其
兄凱章望其速來皖南如果省城安穩請閣下卽令張將來皖
歸凱章處

一左京堂在樂平大獲勝仗現今鮑軍亦至樂平會剿如能將
偽侍王股匪擊退則江西之北邊必可安謐僅南路有偽忠王
一股在腹地耳弟必撥一軍赴吉袁痛剿目下力尙不能弟自

三月初二日赴休甯督軍攻徽兩次小挫十九日仍回祁門現
在餉道不通兵勇久未發餉安慶舍弟一軍援賊來撲正值危
急之際然當臺意堅持以待事機之轉若景鎮安慶有一處得
手則可分兵援吉袁矣

一建昌官紳文武堅守二十餘日實爲非常之奇功應概予優
保請尊處主稿掣列敝銜黃守應飭司詳實投建昌府并保以
道員記名遇有江西道缺請 旨簡放 賞戴花翎其二子亦
應優保弟擬將廣信玉豐湖口建昌數處守城之功專摺特保
數人亦會列銜也閣下去年委署廣信建昌二守保全兩郡
收此奇效老眼無花欽佩之至頃委署九江人地亦極相宜若

撫建廣潯四府得人則省城安如泰山矣省垣城守不可一日無備前商以王守必達署首府渠充做糧台提調於各營皆易聯絡才能肆應於守城亦有閱歷如此位置似尙妥善做處艱險之狀以此兩月爲最然軍心尙不渙散足慰垂厪

覆左季高

徐兆熊自樂平歸接惠書得悉十四日貴軍大捷十五日侍逆鼠竄而去至幸至慰黃文金李世賢兩大股悍賊均賴大力驅除豈特弟之私喜江皖全局當有轉機景德鎮賊巢於何日退淨所卷商之件條列如左卽求卓裁

一婺源曰內正值茶市暢旺之時申令收茶釐二千四百餘金

全不解台盡行冒銷現已撤參應請貴部速進以二千人守婺源五千餘人駐屯溪一則閣下與休寧凱章軍合勢徽城可以速下二則婺源之茶屯溪之釐大可濟餉其婺源縣令亦請由貴營委員中選擇一人弟卽札委可也

一四眼狗於十三日破黃梅十四日破宿松十八日至集賢關必猛撲舍九弟營濠如景鎮饒樂果已一律肅清當檄鮑公仍赴東流建德一帶懷甯危則鮑公渡江救援懷甯安則鮑公繫張家灘一帶以屏蔽饒遠而規復池州

一官相奏請駱帥先援湖北後援江西駱帥奏自率黃子春軍入蜀而派劉蓋臣四千六百人由鄂援江計曰內必在德安雲

夢等處弟函商潤帥擬以劉軍安置九江瑞臨一帶爲兩湖江西三省公同游擊之師北不渡大江東不渡贛水閣下最初所料防李壽成由瑞臨趨潯者得此一着應足禦之蓋臣於瑞臨本是多年熟游之地而其兵力亦儘足制李壽成一股閣下與鮑公皆可不必回顧江西腹地矣

致胡宮保

接左帥信知渠又獲大捷僞侍王鼠竄而去景德鎮克復南岸局勢已鬆可釋屢念狗逆狂竄集賢關日內猛撲舍弟營濠不知若何危險思之震悚聞孝感克復希帥可率成鎮一軍回援懷桐否饒景巢一律肅清必檄鮑軍救援江北但計期已在中

月以後懷桐之憂危在此五日之內已決雌雄不待半月也劉
蠡臣嶽昭一軍駱帥奏令先援湖北後援江西鄙意欲置之九
江瑞臨之間爲江楚三省公同游擊之師閣下如以爲可請飭
劉軍迅赴九江防剿李秀成股匪不知蠡臣現在何處也

覆吳竹莊

頃接手書湖口至邗四日始到猶嫌其遲僞侍王二十萬眾經
左軍屢次痛剿殊快人意目下饑饉浮樂一律肅清惟安慶緊
急飛調鮑軍往援鄙人亦即日移駐東流矣

致左季高

昨有公牘請老兄進剿婺源分兵守城速進屯溪不知閣下以

爲然否如其不可則請收復婺源後以少半守婺以多半仍駐
景鎮更爲穩實求兄酌之弟之調度遠不如兄無所庸其謙也
弟赴東流非其本意若公能克復徽州弟仍當人山駐紮休甯
等處若鮑公可不北渡進攻池州弟在東流略有氣勢否則專
謀一己藏身之術亦不爲也公營保舉及三月各大仗准於五
日內出秦

覆張凱章

婺源旣已無賊左軍當可速來惟尙盤踞德興等處則左公當
畱四千人仍紮景鎮恐其回竄也玉山廣信守城之人與守城
之具均尙可靠但恐循李秀成故轍廣玉未破遽竄撫建是可

慮耳國藩淮於二十六日起行赴東流派鮑公救援安慶朱雲
崖亦自請帶五百人幫舍弟沅甫堅守牆濠限半月仍回祁門
其部下四營守祁者深溝高壘尙屬可靠僕雖暫出江濱若休
黟祁有危險之時仍當入山共相維持也游勇搶奪者假號牌
入休城者務乞立正軍法愈嚴愈好若不與以猛劑則此後葛
藤愈多整頓愈難

致官中堂

飛啟者僞忠王李秀成股匪由撫建竄吉安郡城失守旋即下
竄其欲由臨江瑞州以窺九江圖解安慶之圍已可概見現在
四眼狗至集賢關圍撲官軍營盤國藩調鮑軍自景德鎮起行

抵東流江濱爲渡江援安慶之舉又咨調劉蠡臣觀察一軍由鄂省至九江瑞臨一帶專剿僞忠王一股不知刻下已起行來潯否賊竄九江瑞臨爲兩湖江西三省之公患不可無專支勁旅以禦之劉蠡臣一軍無論現在何處請飭令迅赴九江以趨瑞臨至要至荷特此飛布忠逆一股并不凶悍前在建昌官軍僅七百餘人圍攻二十餘日不下是其明證茲縱橫蹂躪腹地一至瑞臨則江西剿不勝剿兩湖防不勝防務祈閣下迅速派撥一體飛催不勝感禱

覆鮑春霆

閣下督率全軍今夜可宿羊子港神速之至極慰極欣敝處接

舍弟信知安慶極爲穩妥楊
軍門拾船入菱湖奪賊船十四號
多都護在練潭獲大勝仗殺
賊近萬北岸之事大有起色而偽
忠王股匪連陷吉安臨江瑞
州三府有竄九江之信南岸又十
分緊急且恐其由興國以犯
武漢應請貴軍整不渡江且在下
隅阪歇息二三日與國藩面
商一切如北岸果鬆卽請閣下先
撥九江也貴部五正營三副
一新合之河溪仁字馬隊約七千
餘人其三新營截留黃州須
趕緊調回待會晤後卽咨官帥調
之

裴毓中丞

桃樹店途次接惠書知瑞郡
被陷實深憂灼應商事宜條開於

後

一弟於鄱景肅清後二十六日自祁門拔行二十八日住桃樹店二十九日住利步口鮑公亦來會晤聞四眼狗圍舍弟營盤已九日多禮堂在桐城獲大勝仗曰內可援懷甯弟令鮑軍在下隅阪歇息二三日如懷甯急則北渡援懷九江急則西上援九江

一鮑公未到九江之先弟令吳竹莊帶圍防全軍即赴九江守城會同萬泰之陸兵丁義方之水師人近三千或足守禦如事急則請鮑公全赴潯陽

一瑞州既失則臨袁義武奉靖處處可危必須有一支勁旅專

辦此股惟劉燾臣觀察一節最爲相宜弟已兩次函咨商官胡
速調本日又函催矣求閣下加函加咨催之鮑公之力只能願
省會顧九江顧安慶顧東建郡景不能顧武義臨袁也

一李金陽援建敗挫誘過於人此次援吉不能爲一日之守實
屬可惡弟擬奏參革職不准留營

一省城有劉勝祥張運桂兩營弟極爲放心但負城而守則有
餘出外防剿則不足切不可派令出隊開仗恐一有小挫則省
城亦屬可慮只要省城與廣九撫建贛五府平安別處皆易收
拾

致官中堂

日前奉呈一緘商調劉薑臣觀察一軍專剿李秀成股匪不知到否旋聞李逆竄陷瑞州府城并分陷新昌奉新靖安義甯州等處風馳雨驟如入無人之境湖北之興國通山通城均屬可危恐其上犯武昌下犯九江務乞閣下迅飭劉道一軍由興國武甯一帶進兵探賊所向而迎截之此股乃三省之公患而湖北與江西尤爲喫重弟至建德之利步口與鮑公會晤令鮑公在下隅阪休息二三日懷甯急則北渡援懷九江急則西上援九至鮑公之新左新右新中三營未經訓練未編隊伍畱剿黃州萬難得力請閣下飭令速赴鮑處爲荷

覆胡宮保

狗逆拊安慶之背舍弟等謹遵夙指堅守不出雖東路小挫而厚巷常在舍季弟處指點一切或可無虞僞忠一股旣陷瑞州聞又陷奉新義甯務求我公飛飭劉蓋臣一軍由興國出境專剿此股鮑軍之力只能北顧安慶西顧九江東顧東建都鄙距侍不宜過遠左公在婺源距東流已五百里矣

覆吳竹莊

瑞州股匪日內已至何處昨信請閣下帶團防營全軍往守九江想已接到望卽日馳赴郡城會同萬蔡丁等認真設防貴部在湖口守城已有成效潯城雖較湖城略大而三面臨水又有萬護鎮之營兵丁副將之水師當足以資分布僞忠一股多而

不悍不似黃文金之凶猛只要初到時以堅靜二字禦之則其技窮矣黃印山太守以七百餘人守建昌二十餘日是其明證若能守住十日則敵處與胡帥處必派兵往潯鮑朱成三鎮援安慶之師皆可勻撥援潯也國藩抵東流酌帶親兵護衛陳鎮之部仍紮建德東建平安湖口可無虞耳

致胡宮保

偽忠王瑞州一股據生擒賊供欲犯湖北如果九江有備則忠逆上犯湖北乃意中事侍前請以劉靖臣一軍由興國武甯進剿忠逆一股猶是爲江鄂兩省言之若賊由新昌以犯通山通城卽五年冬后達開入江之路是其患專重鄂省劉靖臣當由

省之上游進兵梁子湖以西土匪最多又與公處聲息難通鄂事更棘矣務乞早調劉軍以辦此股至要至要

致鮑春霆

聞步隊馬隊渡江已畢至以爲慰今日天氣晴霽請閣下卽督隊迅速前進胡宮保派胡達軒三營守石牌成武臣七營隨閣下進集賢關兵力已厚尤爲欣慰一切調度布置仍請多都護作主閣下謙以受益同心同德勳福更隆

覆左季高

專丁至接惠書知大旆現駐德興將偵明賊蹤所向橫出截之取遠勢以邀之極好極慰賊若由廣玉以竄河口則日內當已

見仗必入君之轂中矣弟前此兩緘請貴軍專剿李世賢一股
周旋於徽饒信三府之間想蒙鑒納李秀成一股自破瑞州尙
無續報臨江未失差慰人意省城有張運桂劉勝祥二營或可
保全九江有吳竹莊千餘人加以萬秦之兵丁義方水師或亦
尙足支持惟慮其由新昌通山以拊武昌之背弟屢緘催劉蓋
臣來堵輿洽二通未必有濟然今此別無可撥之軍安慶相持
如故春霆渡江至集賢關多都護擊敗璋玕二逆殺賊近萬擊
黃文金股匪亦獲小勝狗酋聞桐城賊兩敗帶大隊往桐畱小
支於集賢關守壘如不能遽勝多軍而霆營又相偪而來計日
亦將他遁然其遞送米糧接濟城賊已不少矣金逸亭克孝感

後進圍德安希蕃尙在滯口靖臣奉希檄圍攻隨州雲琴在沙口黃州之賊屯踞如故斬州黃梅宿松聞踞賊均不多惜無官兵過而問者耳

覆唐桂生

接來函欣悉各營濠牆深固完善至以爲慰在營無事仍望日將濠加深牆高則易塌濠則愈深愈好每棚須種菜一二塊喂猪一隻不特省錢且手種之菜可以卸病駐紮太久總以習勞爲主以種菜爲生至囑至囑

覆毓中丞

一省垣爲根本重地來示張運桂一軍不能不請即留張軍

防守省會第當函告凱章囑其緩調赴徽惟新募之營守則可恃戰則不可靠萬一瑞州賊蹤撲至省城附近一帶切不可令張劉二將出隊迎剿若附城安營靜鎮堅守可保萬無一失

一僞侍王一股經左軍六次獲勝邢休危而復安饒景一律肅清實屬大快人心惟該逆現趨東路聞常山失守廣豐危急恐其又走李秀成之故輒由上清竄入撫建蹂躪腹地左軍現駐德興弟請其由河口攔頭截剿總不使僞侍一股再犯撫建爲要

一九江城守事宜派吳竹莊帶團防營千餘人赴潯會同萬泰丁義方協力堅守據渠等會稟似有六七分可靠瑞州僞忠二

股若不能違志於潯則由新昌以赴鄂境由上高以擾袁州均
未可知弟現飛調劉靖臣軍由鄂南崇通一路進剿不知趕得
及否此外竇無勁旅可調忠逆久爲腹心之患憂灼曷極

一來示欲調秋浦回署府缺秋浦現充弟營務處甫就熟悉斷
難令其離開自去冬以來軍中危險萬狀地方官視爲畏途秋
浦猶能共歷艱危者須畱在弟處祈鑒亮

覆左季高

接惠書知歷口一緘業塵台覽俯鑒芻言申明偉抱至爲欽感
鮑軍渡江冒雨前進狗逆帶隊出關將至高河鋪與多公決戰
中途爲雨水所阻折回冷水鋪計日內必與多鮑開仗矣安慶

之守業已堅定賊亦知其難破東路撲濠一二次西路則并未
猛撲只待多鮑會合似可擊破援賊惟城賊新進接濟難期遽
克耳閣下不守婺源而顧廣信極是極是第後數函亦請貴軍
專辦侍逆一股與之周旋於廣饒徽三郡之間想次第入甌矣
羅近秋史聿舟弟皆見之陳明兩則稔聞之皆英器也宜公之
傷悼不已然亦當節省保衛爲國自玉

覆楊厚菴

舍季弟東路防務未臻完固得閣下照料一切趕修水壘賊不
敢爭深用感慰成名標此次再出本欲力爲扶植以酬其創始
之勞及觀其頽然衰老難期遠到尤增憫惜粵東購礮之行其

斤重與原開之單不相符合又往返時日太久鄙心深不以爲然夾帶私鹽亦必非無因而被誣是以日久未與申理頃接三人公稟憐其羈係之苦讀其情詞之迫自不能忍置不問今閣下又以爲言擬卽日備咨粵東督撫請其省釋惟粵督勞公前此不甚相能而耆中丞由江西調粵疑鄙人有密劾之舉懷嫌尤深此次似修怨於敝處而借成李黎三人以洩其私忿敝處雖有咨往恐非徒無益而又甚之耳水師購礮大事也嗟咄嫌疑小隙也夾帶私鹽亦小眚也因小故而誤大事疆吏之居心如此言之慨然

獲胡宮保

惠書敬悉多飽成三君赴援本有可以屠狗之理惟布置周密人謀之可知者也狗酋是否逸去天事之不可知者也九舍弟出關看地勢所帶楊鎮南土馬隊小有挫失瑞州賊窟新昌深慮其擾興治崇通劉靖臣不可不赴鄂南也

正封緘開接奉初八日辰刻惠函觀尊書之精湛欣玉體之康強孰謂天下事不可爲哉漢家宗社英靈在定是寒儒浪自愁請爲朗誦一過

覆姚秋浦

惠緘接到敬悉陸運事料理妥善紳董皆樂爲用至以爲慰將來如辦陸運則駕輕就熟遠勝臨時周章也現飭各營安設步

撥糧台派夫一節即可省矣安慶各軍皆已到齊李希帥以金
逸亭攻德安劉靖臣攻隨州而自駐澠口調度二月初七鉅野
之役伊興額滕家勝兩帥陣亡僧耶在濟甯收集潰卒珂鄉心
甚危急近有續報否

致毓中丞

前聞瑞州之賊西竄新昌方爲少慰茲忽聞平江和後等營敗
挫瑞賊猖獗實深憂灼俟安慶之事稍紓卽當飭鮑軍南渡速
援瑞臨新授南贛鎮陳伯陵前赴新任弟令其招勇一千認真
訓練以備緩急到省後求閣下指示一切迅囑往贛伯陵操守
廉潔篤實不浮熟於戰陣到任後當可保障南路惟屢次受傷

稍嫌體弱須加意調理耳

獲胡宮保

多公約舍弟出隊侍不甚以排鎗記號爲然與來示引證相合何所見之同也鮑公攻關外之赤岡嶺四賊壘傷至七八百人亡至百餘人舍弟攻菱湖中空之九賊壘傷至三百餘人亡至四十人精銳暗損深爲可慮狗逆至挂車河尋多公開仗不知戰狀何如安慶之圍究竟應弛否請厚菴裁定而侍證成之

致楊厚菴

頃接橘堂信得悉水陸進剿情形台旌駐獅子山等處勤勞晝夜至以爲系鮑軍攻堅受傷者過多狗酋若由桐城再回集賢

關官軍應如何設法防禦念弟欲將菱湖中空之賊壘一并圍之似尙可行鄙意欲請鮑成二軍同進紮高橋嶺紮定後一二日成軍進紮菱湖賊壘之後西與九弟各營東與季弟各營通爲一氣卽與高橋嶺之鮑軍獅子山之水軍亦皆通爲一氣狗酋自桐歸來若攻成軍之營盤鮑軍可自後夾擊之且濠濠修成之後卽堅守不出坐營中以餘礮轟之亦無不可不過一月將長濠修成武臣與沅甫等儘可保守無虞多鮑兩軍儘可抽出一軍擊他處之賊閣下如此說爲然則請告之睿憲武臣卽日移營并請告之舍弟沅甫商妥以便興辦

獲楊厚菴

惠書具悉赤岡嶺區區賊壘四座官軍欲急破之以收克城之速效此閣下報國之忠誠非春霆之失雖傷亡頗多而士氣尙壯至以爲慰爲今之計惟有請春霆進紮高橋嶺請武臣進紮菱湖賊梁之後西與九舍弟營合龍東與舍季弟各營合龍狗逆自桐城歸來若撲成軍可坐營轟擊之若撲高橋嶺鮑營亦可堅壁不出待賊力極疲而後出擊之如此辦法似足制賊之死命昨已專函奉商閣下如以爲然卽請商之鮑公迅速移營此閒三日之內長水一尺六寸狗逆自桐城回懷或難遽渡

覆朱雲崖

九舍弟移六營於菱湖賊壘之後本是善策惟地段太長兵力

太單甚不放心應請成武臣帶七營進紮菱湖合成長圍紮定半月之後另撥數營前往替換抽出成軍改剿他處可也貴營移紮西路半月之後亦當撥營往替俾閣下仍回祁門目下祁黟平安張家灘之賊諒不足慮

覆毓中丞

瑞州有此一敗賊氛日熾蹂躪於瑞臨袁潯之交實爲腹心大患來示欲鮑張二軍入援內地義不容辭惟張軍現守休甯萬難抽動棄休甯則必并祁門黟縣而皆棄之不特無以對皖南紳民亦且貽患於饒景鮑軍進攻赤岡嶺賊營四月內當可擊退狗酋一股五月閒乃可渡江由潯赴瑞目下實不克遽往省

城防務只要劉張二千人負城紮營堅守不戰必可萬全九江有吳丁萬蔡四人或可保全此外必徧遭荼毒矣可憾可愧李金暘從賊之說事或可信近日官兵敗後從賊者頗多如張國樑之部李若珠之部周百祿之部陳餘菴之部皆所不免李金暘尤不可靠惟專憑張光照一人供詞則不足據凡敗後先奔者往往架言誣人以掩其先逃之罪祈再確查以憑具奏核辦

覆李少荃

春霆攻赤岡嶺四賊壘陣亡者百餘人受傷近八百人舍弟攻菱湖九賊壘陣亡者三十餘人受傷過三百人精銳暗損行軍之大忌若狗逆自桐歸來與我惡戰深慮無以制之幸日內江

湖水漲長至四尺有奇或不能遽渡河耳瑞州一股實爲腹心
大患曰下無兵入援憂灼何極李金陽從賊獍子野心自無足
怪惟專憑張光照一人供詞則不足據凡敗而先逃者每好造
言誣人且人心不齊一人從賊亦無全軍俱叛之理尙當確查

獲吳竹莊

昨接來牘果欲引疾目下瑞賊窺伺九江建德之賊又窺湖口
此兩處皆必爭之地又鄙人隱憾之地務求閣下毅然自任卽
在湖口靜養如汲黯之臥治亦無不可如九江急則請投杖赴
潯湖口急則請力疾守湖至囑至囑

覆張凱章

鮑軍攻赤岡嶺四賊壘受傷近八百人陣亡百餘人攻堅之難如此舍弟現以數營紮於中段並菱湖賊壘皆以長圍包之矣建德失守東流與休祚中梗文報不通軍心民心難免搖動務求閣下靜鎮使三縣兵民有所依歸至要至要

覆胡宮保

接奉手教圍師不可改絃而拙書與厚韃者尙可采用剖斷精嚴敬以爲佩舍九弟業已添六壘於菱湖之後並菱湖賊壘概以大圍包之又決計不要成軍進關壽珊之計從后門湖起橫兜至集賢關止其說必可行又策四眼狗不能遽回懷甯亦極精確不特怯於兵力之厚且江漲六尺有餘練潭一帶必爲礮

船所截勢亦不能回援也狗酋用兵固狡固活然過於取巧則拙者有時勝矣

覆鮑春霆

日內江水盛漲增至七尺有餘狗酋已由練潭過河回援安慶否貴部本極精悍屢立奇功近來副五營中後兩營匪夥左右兩營不甚得力新三營在黃州小挫老五營中弁勇傷亡甚多此數事者均暗暗喫虧應請閣下加意檢點雖人數多於八九等年而其小心謹慎應比往年更加嚴整營盤須距水師甚近庶糧路可保無虞至囑至囑

覆李筱泉

前接惠書稍稽裁復祁門軍事自左鮑并力擊退黃文金大股後滿擬可以少安乃黃逆西路甫清而偽侍王李世賢又從東路婺源竄至梟鎮蔓延鄱陽樂平浮梁等處梗我後路塞我餉道幸二三月左軍六獲勝仗鮑軍亦自東建趕至侍逆始行敗走竄至玉山衢州一帶左軍跟蹤追剿慮其再由廣信以擾撫建由是徽之祁休等屬糧路始通軍心大定皖南差有起色而逆酋四眼狗連陷湖北二府五縣踞城堅守自率大股直下安慶拊官軍之背遂令鮑軍北渡救援鄱人亦移駐東流江濱就近調度日內狗酋以堅壘抗拒鮑軍自赴桐城糾集偽璋王玕王各股來援計本月必有幾次惡仗其吉安一股踞瑞窺潯深

入腹地郭守之敗省城大震亟催鮑軍入援論餉項則宜清腹地論大局則宜圖安慶安慶不穩鮑軍不能遽援瑞郡也目下張朱唐堅守祁休左軍經營廣信鮑軍南北策應均日夜勞苦不得少休餉項久虧務乞閣下從上游設法以大批解濟千萬之懇

覆胡宮保

成軍應從公與壽珊之議從石門湖紫至關外侍已兩次奉報並緘告厚菴與舍弟又告春霖矣來示不有小誤則不仁不宏斯言甚大可爲萬世圭臬尤可爲編者鍼砭左公久無信來不知何故僞侍圍玉山旣而解圍以去若由廣豐以趨撫建左軍

當可堵截耳

覆官中堂

此次逆首上犯仰賴盡籌周密眾志成城省垣旣安如磐石各
路亦勁旅星羅危局復安驩抃曷旣此聞軍情自鮑公至大橋
頭狗酋卽率八九千悍賊至桐城挂車河尋多公開仗爲多公
所敗躡毀賊壘八座適值江湖盛漲十日以內驟長九尺有奇
狗酋爲練潭湖水所阻勢難遽回懷甯舍弟得趁此時圍住菱
湖中空之賊壘鮑成亦趁此時圍住赤岡嶺之賊壘以勢揆之
安慶自可克之理特聞漢奸依託洋船暗通接濟未知究竟
何如耳劉薑臣軍攻圍隨州關係襄樊全局自不宜輕於調動

江西僞忠王一股盤踞瑞州並不甚悍現在省城及九江兩處
防守之具略備瑞賊雖久踞郡城亦不過與黃蘄等城相類惟
恐其竄出或擾及武義崇通等屬則爲江西兩湖之公患當另
謀勁旅驅除之也建德失守距弟駐之東流僅四十里刻下尙
無兵力可往則辦且當度外置之

覆李希菴中丞

頃奉惠書知前兩緘均達荃照上游德隨尙無好音逆黨堅悍
善守圍攻則傷我精銳頓我兵力不圍攻又豈延它處毫無遮
遏隨州關係襄樊全局蓋臣觀察一軍不能遠令南渡自有不
得已之深衷瑞賊盤踞日久省垣及九江略有防備或可無虞

惟慮其竄擾武義興冶崇通等處則爲兩湖江西之公患須另籌勁旅驅除之耳池州賊股擾陷建德散處近在咫尺無兵往剿前請義從營速來亦正爲此彈壓附近小股也

覆胡宮保

果臣之信深痛不可讀屬蔣辦糧台時則豐亨豫大閹君辦糧台時則山窮水盡與侍之接辦徽防情事頗同不可謂非造物之游戲播弄也自出江濱常思輕裝一至太湖爲風雨所阻又苦俗務不少柰何盈盈一水脈脈相照而已

覆劉印渠中丞

頃奉惠書至爲佩慰此閒極望增兵而餉項大絀雖減兵而尚

不足以給逆黨救援安慶取勢在千里以外今雖勉強支撐未
弛安慶之圍而內地糜爛餉源日竭殆有岌岌不可終日之狀
所幸局勢雖艱軍心未渙左季高以五千新集之師屢摧十倍
堅強之寇將來必能爲國家開拓疆土廓清逆氛多鮑諸軍
亦皆整嚴精勁蒸蒸日上或者得眾動天倘可挽回於萬一乎

覆李少荃

兩次惠緘敬悉一切鮑公攻破四壘後卽拔行入撥因江濱處
處隔水繞道由潛山太湖至武穴渡江計程千有餘里斷難迅
速然此外別無捷徑左帥全軍至景德鎮石門建德之賊聞已
退避一則畏左公之軍威二則因揚軍門攻池州急謀回救也

古賴犯黜之賊亦經張唐諸軍併力卻之當可少安須與梅小
岩能速來甚妙閣下久不來營頗不可解以公事論業與淮揚
水師各營官有堂屬之名豈能無故棄去起滅不測以私情論
去年出幕時並無不來之約今春祁門危險疑君有曾子避越
之情覆聞東流稍安又疑有穆生去楚之意鄙人徧身熱毒內
外交病諸事廢閣不奏事者五十日矣如無醴酒之嫌則請旨
旆速來相助爲理小岩而外尙擬添請五六人分手辦理庶事
無停格而人得更休耳

覆江良臣

徽州收復喜出望外同深慶慰惟復徽尙易守徽極難現在唐

桂生四營已進休城婁副將兩營歸併鮑處漁亭全無一營實
不放心特咨請貴軍移駐漁亭并將大洪禾戍各嶺防兵一概
帶去庶漁防兵力較厚微休兩城之糧路不致中梗惟弟相隔
甚遠就目下軍情而論究竟柏溪與漁亭兩處孰重尙不深知
請閣下與雲崖熟商如果漁亭可保無事則柏溪與洪禾各防
兵紮住不動亦係穩着弟以漁亭爲重者以其爲微休之糧路
所必經也特此緘商乞卽詳復

覆張凱章

接惠書員悉欽城日內可以畢工一律完好前請左軍撥三營
進紮漁亭後又請其以三千人防漁者蓋以漁亭爲微休糧路

所必經也。頃聞德興之賊將至婺源左軍須分剿婺源卽不能更顧瀟亭聞徽城之糧足支兩月徽休以婺源爲後路祁門以景鎮爲後路均有深固不搖之象卽黟瀟之防稍疎或亦無礙全局令弟千人調徽毓中丞堅持不冑敵處續去一咨一緘不知果放行否樞園若來則貴處可守可戰不來則但主堅守可也。

批姚秋浦稟

末條本有切實下手之處前數條雖空話皆仁言也閣下有仁心有遠識大本已立矣所患者在不善擇不善棄耳如有兩事宜行一急一緩則當擇其急者棄其緩者若兩事並急則當擇

其尤急者棄其次急者如有兩人宜用一優一劣則當擇其優者棄其劣者若兩人並優者則當擇其尤優者棄其次優者推之行文之命意用兵之爭鬪有所擇不能不有所棄閣下若不善於棄欲諸政並舉則恐一事難成祈審擇之

覆胡宮保

惠緘敬悉玉恙稍平當可日有起色此間占者亦屢言尊體無虞也安慶自破菱湖賊壘十八座後將西北營盤聚近汛地較短防守較易援賊再至或足禦之春霆擄民船千餘在宿松拔行連日未遇順風尚在徐家橋一帶鄂之東西有何紹彩一軍東南有成大吉一軍或足了事鮑軍卽由武穴之對岸登陸由

瑞昌武甯至瑞州亦可與成軍互爲聲援侍卽日函告春霆如
閣下以爲可亦望告之也左軍半紮景德鎮半紮婺源微休祁
門一帶尙屬安靜建德張家灘現亦無賊惟餉項太絀殊無良
策侍瘡疾略愈李少荃梅小巖均來積閣塵牘當可漸漸清釐
作梅已自益陽北旋否大阡已徙葬否書院興工否數事就緒
尊恙益霍然矣